

Indra Zaandam:

Ta trahando duro pa trabounan di reconstruccion di Plaza Betico Croes keda ta cla pa 18 di maart

Indra Zaandam, consejera di Cultura di Minister Otmar Oduber a indica orguyosamente cu Plaza Betico Croes a drenta un etapa nobo unda ta haciendo trabounan di reconstruccion.

E plaza a wordo traha na aña 1986 y ta uno hopi simbolico pa nos pueblo mirando cu ta dedica na un persona cu ta representa masha hopi pa nos pueblo, nos Status Aparte y nos cultura.

E reconstruccion di e plaza lo ta parti den dos fase. E prome ta e parti di e podium y e koepel, cual pa hopi aña no a haya atencion y tin diferente kehonan, manera entre otro cu blafon ta bin abou.

E contratista cu e gana e bidding pa esaki ta G&S Contractors NV.

Mester bisa cu bou di e podium tin un espacio suma-



mente grandi unda cu por traha cambernan y baño, cual tambe lo tuma lugha. E di dos fase lo ta e renobacion di tur e klinkernan cu tin dilanti siguiendo consejo di expertonan y BIC N.V. cu a gana e bidding.

Sra. Zaandam ta bisa cu Minister Oduber su vision ta pa e plaza aki ta uno den top

condicion teniendo na cuenta cu tur evento cu tuma lugha eynan ta un reflejo di nos cultura y historia di Aruba cu a conduci na hiba nos unda cu nos ta awendia.

Trabounan ta wordo haci intensamente pa reconstruccion di Plaza Betico por keda finalisa prome cu dia 18 di maart mirando cu ta celebra 30 aña di nos Status Aparte y 40 aña di nos Himno y Bandera, algo cu como Arubiano nos ta hopi orguyoso di dje.

No a inicia prome cu e trabounan di reconstruccion debi na e gastonan di esaki, mirando cu pa añanan no a duna atencion na Plaza Betico Croes. E gastonan ta na e momentonan aki rond di 1.3 miyon, cual ta un suma grandi. Motibo di esaki ta e tempo cu mester keda cla cun'e y tambe mirando cu ta bay

haci un stage multifuncional, e trabounan di e koepel ta aumenta e gastonan.

Esnan cu a contribui cu e fondonan pa haci e reconstruccion aki posibel ta ATA, TPEF y FDA.

Mester bisa cu debi na e falta di mantencion durante añanan largo, e estado di e parti patras di stage tabata uno sumamente deplorabel y cu e inversion cu ta den proceso

siguiendo e vision di Minister Oduber, e lo ta uno digno di por ta ubica na Plaza Betico Croes unda diferente actividadnan y manifestacionnan cultural lo por wordo realisa.

Intencion tabata pa por a logra tin Plaza Betico Croes cla pa dia 25 di januari, dia cu ta conmemora e gran estadista aki, mirando e gran trabounan cu Betico Croes a haci pa nos pais y nos Status Aparte, lamentablemente esaki no a logra debi na e motibo menciona ariba, cual ta fondonan.

Di otro banda mirando e importancia cu e propio Betico Croes a duna na e fecha 18 di maart, ta concentrando tur esfuersonan pa trabounan por ta finalisa prome cu e fecha aki.

E maneho di Plaza Betico lo ta temporalmente bou di Stichting Cas di Cultura pasobra nan ta mas cerca y nan tambe ta un organizacion cu ta enfoca riba cultura y promocion di nos cultura. □

